

FILIPAI

POL FILIPAI KAT PILIWUTA PAS

¹ Wun Pol wun. Timoti wunogwio tigandi. An Kraist Jisasna njivwa kwutiga nyanli. Filipai walinja ngepmamba Godna mbaapma nimba kat kan pas piliwutaa kwiligowun. Ngwuk Kraist Jisasna nyaangit ngwutna maawupmba yelavika kwutaa tigangwuk. Ngwulogwi lika njambwi nimba ndinogwi wutnjangat kan pas piliwutaa ngwuk kat kwiligowun. Ngwuk kat Godna njivwa kwuka simogwi liga nyangu kat ndino ndi kat piliwutigowun. ² Nina nyaek God nina njambwi nyan Jisas Kraist ngwuk kat apma vat yelavika yetingweya maawut awagapma kwimbambit walaa ngwuk kat wowun.

POL GOD KAT SIVU KINDI

³ Tiga liga ngwuk kat yelavika tuwa njimbla wuna njambwi nyan God kat gwuk kat tiga sivu kiligowun. ⁴ Ngwuk kat tiga God kat wagalaweya njimbla nima vat solat siligowun. ⁵ Tamba liga wan apma nyaangit butiwa njimbla wunogwi nala kita vat njivwa kwutingwuk. Yiga liga mbambala wunogwinala kita vat at kwutigangwuk. Wunogwinala kita vak njivwa kwutingwa vak kat yelavitaan ngwuk kat nima vat solat siligowun. ⁶ Kita da tamba viga ligowun. Tak God ngwuk kat kwunapmak njivwa kwutindi. Ngwuk kat kwunaka liga yiga Kraist Jisas yaiga njimblamba apma vat tigiayangwuk. Ngwuk kat kwunatinda njivwa ngilindi maa Kraist Jisas

yaigandi. Viga ligowun. ⁷ Njimbla ngwuk kat yelavika luwa vat nglaatndi. Tamba wan apma nyaangit yi ya butuwa njimbla wunogwinala kita vat njivwa kwutingwuk. Mbutuwa nyaangit kat kaiwalaa wun kat kalabusmba taagandi. Mbambala wun kalabusmba liwun, wun kat ana kwagala ligangwuk. Ngi kat tiga ngwuk kat njimbla njimbla nimamba yelavika ligowun. ⁸ Ngwuk kat wuna maawupmba yelavika tuwa vat Kraist Jisas ndino ngwuk kat yelavika linda vat kita vakna. Ngwuk kat woseka ana wowun. God viga ligandi. ⁹ Ngwuk kat tiga god kat wagalaweya njimbla kupma wagalaligowun. Nat nimba kat nima maawut yelavika tinja maawut yiga nima yimbandi walaa waligowun ndi kat. Godna angwa vat viga wuka tinja vak nima yimbandi walaa ndi kat waligowun. Kan vat apma vat kan vat kavle vat waa siga nagulinja apma vat yiga nima yimbandi walaa waligowun ndi kat waa wupma God kat wagala ligowun ngwuk kat tiga. ¹⁰ Wagala luwa vat klangweyan apma vat tiga kavle vat kwagalalaa apma vat mina tigiyanwuk. Ngini Kraist yaiga nandinya ngwuk kavle vat ana ligiyandi ngwulamba. Apma vat mina ligiyandi ngwulamba. nat nimba ngwuk kat vilaga ndi kavle nimba ndi waga ana ngwuk kat waigandi. ¹¹ Jisas Kraist ngwuk kat kwiya apma vapba yetigiyanwuk. Wan apma vak nat nyanamba ana klaigangwuk. Nat nimba yetilingwa vak vilagalaga Godna si kwutaa kat-soga apma nyan min waa waigandi.

POL KALABUSMBA LINDA VAT

¹² Wuna mbaapmamba liga nimba mbambala kita vat vingwan kat wowun. Wun kat kwutaa kalabusmba taaganja vak kavle vat ana ndi. Taagandi maa vilaa nima sakwat nimba wan apma nyaangit wutndi. Kan apma vakna. ¹³ Wun kat kalabusma taagandi maa vilaa ndi Kraistna njivwa kwutindan kat vilaa ndi kat kalabusmba taagandi waa waligandi. Njambwi nyan Sisana gay viga la nimbo nat nimba vilaa wupma waligandi. Kan apma vakna. ¹⁴ Nina kita mbaapma nimba kalabusmba tuwa vat vilaa vaaka linja vak kwagalalaa wan apma nyaangit vaat tapmannat nimba kat mbutigandi.

¹⁵ Nat nimba wun kat kai walaa Krasitna apma nyaangit yiga mbuka pol kat kwagalalaa nina kwupmba yagwa ngwula waa waligandi. Nat nimba Pol ndi apma nyana waa Kraistna apma nyaangit viga mbutigandi. ¹⁶ Wuna si katsoga nyaangit mbutiga nimba wun kat woviyaguga ligandi. Tak God wunkat wandi maa kavle nyaangik kat kai walaa wan apma nyaangit mina mbutigowun. Ndi wan nimba kwutuwa njivwa kat vicaligandi. God wan njivwa Pol kat kwindi waa viga ligandi.

¹⁷ Wun kat waliga nimba kavle maawut yelavika liga Kraistna apma nyaangit mbutigandi. Avla nina si katsolina vak Pol kalabusmba liga vilaa ndi mbangi vali yilindi, tigandi. Apma vatna waa yelavita mbutigandi. ¹⁸ Apma maawut yelavika kavle maawut yelavika mbutinjeyan wovuna. Ndina mala. Kraistna apma nyaangit mbutinjeyan wun wutaa solat sigiywoun.

*KAN KIPMAMBA KWO LIWEYAN JISASO
TIGIYOWUN*

¹⁹ Kalabusmba tiwun, wun kat God kat wagala ligangwuk kalabus kwagalalaa wogwewangat God kat wagala lingwa vat viga ligowun. Jisas Kraist kwiya waagan ndina apma maawut wun kat kwiligandi. Ngi kat tiga kalabusmba tiga kwagalalaa wogweweya vak viga ligowun. ²⁰ Wunai yelavika liga vat kingiyan. God wun kat kwiya njivwa wun kwagala vak kat kai wowun. Nandinya nandinya vaat tapman kwupmat wawun. Mbambala nimbun kwupmat wowun kan njivwa. Kan njivwa kwutiwunmala Kraist wun kat vilaa apma njivwa kwutima waigandi. Kan njivwa kwuka liga kiyaweyan Kraist wun kat waigandi. Apma njivwa kwutnimin waa waigandi. ²¹ Kiya lapman kan kipmamba kwo liweyan wovuna. Kipmamba kwo liga Kraistnonana kitamba yetigiyowun. Kiyaweyan wovuna. Kiyalaa apma wenga klalaa apma kavamba yiga ligiyowun. ²² Kiya lapman kan kipmamba kwo liweyan nima sakwat apma njivwa kwuka tigiowun. Kiyaweyan apma kavat yigiyowun. Kiyaweyan apma vakna? Kiya lapman yiweyan apma vatna? Wun ana yelavika viga ligowun. ²³ Maawat vililik yelavika ligowun. Kan kipma kwagalalaa Kraistnana yiga tivat tigowun. Apma vatna. ²⁴ Kipmamba tiweyan ngwukkat kwunapmak njsvwa kwukiyowun. Wan apma nglei vatna. ²⁵ Kan kipmamba kiya lapman kwo liweyan apma vala. Viga ligowun. Kwo liga ngwuk kat kwunapmak kan njivwa kwuka ligiyowun. Ngwuk Kraistna nyaangit

wutaa solat siga maawupmba yelavika kwutaa lingwuk. Ngwuk kat kwunakwun, solat singwa vat nima yigiyandi. ²⁶ Ngwutnai liga kava yawun maa maawupmba yelavikiyangwuk. Nin Kraist Jisas kat ndi kat tiga wagalanin, kalabus kwagalalaa wogwelaa yandi. Kraist Jisas kat kwutaa lina vat tagula vatna waa yelavikiyangwuk.

WUNOGWINANA NJIWA AGWUK NGWULA WAA WANDI POL

²⁷ Kita nda nima nda ngwuk kat mbukiyowun. Ngwuk apma vat mina yiga Kraist waa nyaangit mina wuka yetingwula. Ngwuk kat ngini vivat yaweyan apma vat yetingweya vak vigiyowun. Ngini ngwuk kat vivat ya lapman yiweyan apma vat yetingweya vak waamba wukiyowun. Ngwuk kita maawut yelavika kitamba njivwa kwuka wan apma nyaangit mbutingwa vak wukiyowun. ²⁸ Ngwuk kat kai waliga nimba kat ke vaakngwa. Vaatapman kwondumba ali ngwula. Vaatapmankwondumba lingwa vak kai waliga nimba vilaa waigandi. Nin kavle yigiyandin waa waigandi. God ngwuk kat kwondu kwindi, apma vat tigiayangwuk. ²⁹ God gwuk kat njivwa kwuka tigungwuk. Nat kita njivwa kingiyan kwinda. Kraistna si mbukngwuk maa nat nimba gwuk kat vilaa nima vak yigiyandi. Ngwuk wan vak kat ana kai waigangwuk. ³⁰ Wuno wun kat wupma yilindi. Mbambala wuno ngwutno kita njivwamba kwutiganin. Mbambala kwutuwa njivwa tak kwutuwa njiva vla kwutigowun. Njivwa kwutuwa vak tamba waamba wuka

ligangwuk. Ngi kat tiga wunokwinala kita vat njivwa agwuk ngwula.

2

NAT NIMBA KAT NIMBA MAAWUT YELAVIKIYANIN

¹ Kraistna mbaapma wuleilaa kwondu maawutno ligangwuk? O kai. Kraist nin kat nina yelavika tinda vat apma vatna waa yelavika ligangwuk? Ana yelavika ligangwuk. Godna waagan yelavika liga vat kita vat yelavika ligangwuk? Kai ana yelavika ligangwuk. Awat sowat woviyaguga kwunatigangwuk? Ana kwunatigangwuk. Wungi apma nda ngwulamba tindeyan wuna nyaangit ngwuk awuk ngwula.

² Wungi apma nda ngwutnamba ligandi. Viga logowun. Wungi apma nda ngwulamba tindi, viga liga solat siga ligowun. Ngwuk kita maawupmba yelavika ali ngwula. Wupma yilingweyan ngwuk kat solat siliveya vat niman nglei yigiyandi. ³ Avla ngwutna si katsovat njivwa ke kwukngwa. Wun apma nyan wun waa wavat njivwa ke kwukngwa. Nat nyan kat yelavipmbangwuk njivwa kwupmak kat. Nat nimba kat kwulatigowun waa ke yelavikngwa. ⁴ Ngwuk avla kwunapmak kat ke yelavitngwa. Nat nimba kat kwunakngweya vak kat yelavik ngwula. ⁵ Tat Kraist Jisas yelavitnda vak vla mbambala ngwulo wupma yelavik ngwula. ⁶ Kraist Jisas tak yelavitnda vak kingiyandi liga. Tak ndi God tinda vla tindi. God ta vla tuwa vat ana kwutaa ligiyowun waa yelavika lindi. ⁷ Ndina maawupmba God tinda vak kwagalalaa kan kipma ngega yandi. Yalaa ndunyana mbangi klalaa ndu nyan vla lindi. Njivwa kwuta nyan

vla lindi. ⁸ Ndina yelavik vapmba ana yetindi. Godnana yelavik vapmba yetindi. Yetiga liga God wandi mala kiyandi. Diwai krosmba ndi kat kaalandi maa kiyandi. ⁹ Ngi kat tiga God kwuta njivwa kat vilaa ndi kat nyinangwut kalilaa njambwi nyan min waa wandi. Mina si nat nimbana si kat kwulatigandi waa wandi. ¹⁰ Ngini nyinangwupmba liga nimba, kipmamba liga nimba, kiya nimba aywaa Jisas kat vilaa ndaa kwali mamba silaa ndina si kwutaa katsogiyandi. ¹¹ Jisas Kraist min njambwi glei nyan min waa kwundimba waigandi. Walaa nina nyaek God min Jisas kat apma vat yimin waa waigandi.

YA VFIIGA LAM VLA LIGANGWUK

¹² Ali nimba tak ngwulogwinala liwun, wuna nyaangit wuka lingwuk. Mbambala tulala sivlamba tigowun. Mbambala nimbun wuna nyaangit awuk ngwula. God ngwuk kat kwutaa tamba ndina mbaapmamba ngwuk kat taagandi, tiganwuk. Mbambala Godna nyaangit wuka ndina njivwa nimamba kwuka tigiyanwuk. Nima njivwa kwuka lingweyan God ngwuk kat kwunapmat tinda vak klaligiyanwuk. ¹³ God ngwuk kat apma maawut kwiligandi. Kwinda maawupmba yelavika ndina njivwa mina kwutigiyanwuk. ¹⁴ Kan aywaa kwutingwa njivwa woku walea wata kwutingweya. Kwo akwuk ngwula.

¹⁵ Wupma kwutingweyan Godna apma nyangu vla tigiyanwuk. Kavle vat ngwulamba ana ligiyandi. Kan kipmamba liga nimba ndi kavle vat yiga yetiliga nimba ndi. Ndina nindimba

liga ya vitiga lam vla ligiyangwuk. Apma yambi ndi kat visimogwigiyangwuk. ¹⁶ Ndi kat Kraistna apma nyaangit mbukngwuk maa di apma yambimba yigiyandi. Wupma yaigweyan wun solat sigiyowun. Kraist yaiga nandinya wun ngwuk kat vilaa yelavikiyowun. Ndi kat kwunapmak kwutuwa njivwa kwo njivwa ana ndi kwutuwa. Ndi tamba apma vat tigandi.

¹⁷ Tak ngwuk kat wan apma nyaangit mbukwun. Mbukwun mala wutaa kwutaa ligangwuk. Kwutaa lingwa vak God vilaa apma vatna waa waligandi. Ngwuk kat kwunatuwa njivwa ana kwagala ligowun. Kwutaa ligowun. Kan njivwa kwuka liga kiyaweyan apma vala. Ngwuk kat kwunakwun, ngwula maawut tagula vat tndeyan wun vilaa solat sigiyowun. Solat siweya vat ngwuk kat mbupmat wowun. ¹⁸ Wawa nyaangit wutaa ngwulo wun kat solat singweya vat wun kat ambuk ngwula.

SAMAT TIGA TIMOTI NGWUK KAT YAIGANDI

¹⁹ Njambwi nyan Jisas kai walapman yindeyan samat tiga wowun maa Timoti ngwuk kat yigiyandi. Ngwuk kat vilaa yalaa yetingwa vak wun kat yaa mbukiyandi. Wutaa solat sigiyowun. ²⁰ Timoti yeta vla yetigiya nat nyan ana ligandi. Ndinno wuno kita maawut yelavika tigaa. Ngwuk kat nima maawut yelavika ligandi. ²¹ Nat nimba avla ndina nda kat mina yelavika ligandi. Jisas Kraistna njivwa kat ana yelavika ligandi. Ndi wupma kai. ²² Timoti kat viga ligangwuk. Apma nyana. Ndinagwio wunogwio kita vat wan apma nyaangit mbuta. Nyaek nyan vla ligaa. ²³ Timoti

min Filipaiat ay waa yelavıtaviga tigowun. Wun kat yaiga vat ana viga ligowun. Yaigowun? Ana yaigowun. ²⁴ Nima nyan kat wagala ligowun. Ngwutnai liga kava kwiyatapman yavat wagala ligowun.

SAMAT TIGA EPAFRODAITAS NGWUK KAT YAIGANDI

²⁵ Epafrodaitas kat ay wowun maa ngwuk kat ndi yigandi. Ndi nina kita mbaapma nyana. Wuno ndino kitamba Godna njivwa kwutili maa angat vat yilindi. Ngwuk kat tiga wun kat kwunatigandi. ²⁶ Ndina woviyaguga vat nima nglei tigandi ngwuk kat vivat. yelogwen kat tinda vak kat wukngwa vak wutaa ndi ana ngalaatndi wandi. Wun kat nima maawut mbaak yelavıka ligandi waa wandi. ²⁷ Mat yelogwen ana ndi. Nima yelogwena. Tamba kiya mina lindi. God ndi kat miwa yilaa kwunatndi, laatndi. Wuno wun kat miwa yindi. Epafrodaitas kiyaindan wuna mbangi ngumik kwukendi. ²⁸ Ndi laatndi mala kwonduo wogwuga tigowun ngwula lak kwivat. Ndi kat vilaa solat sigiyangwuk. Solat singweya vak wutaa wuno solat sivat tigowun. ²⁹ Ngi kat tiga solat siga ngwula ngayat kali ngwula. Ndina njambwi nyangwutna njambwi nyan kita nyana. Ngwuk kita yakwa nimba vla ligangwuk. ndinai liga vla tiga nimba ndina si kwutaa katsongwula. ³⁰ Ndi Kraistna njivwa kwuka liga tamba kiya mina lindi. Ngi vak kat ana yelavıka lindi kiyavak kat. Apma vak walindi. Ngwuk sivlamba tingwuk. Wun kat ngwuk ana alitsiga kwunatingwuk. Ndi wuna

ngwaymba tindi. Ngwuk kat tiga wun kat kwu-
natindi.

3

POL KRAISTNA ANGWA VAK KAT KWATIGANDI

¹ Nina kita mbaapma nimba ngini la nyaangit kingiyan ndi piliwukwa. Nima nyan ngwuk kat apma maawut kwindi maa solat singwan kat wowun. Tak piliwukwa nyaangit at nat njambi piliwutaa kwigiyowun. Nima sakwat njambi kan nyaangit piliwutaa kwiweyan wovuna. Kan nyaangit wuka lingweyan ana kavle yigiyangwuk.

² Kavle vat yiga yetiga nimba kat viga tigiyangwuk. Ndi kwapimba yetiga waala vla tigandi. Ndi mbangina vak mina yelavika gwutna mbangi pipmak wandi. ³ Mbangi nglambi ana ligandi waa pitigandi. Pitndi maa nglambi nglambi ligandi. Godna waagan mina nglambi silimbwiligandi. Nina maawupmba la nglambi Godna waagan ngega yaa silimbwindi, nin kwo liganin. Mbangina nda nin ana nima yelavika tiganin. Nin Kraist Jisna mbaapmamba wuleilaa tiganin. ⁴ Kan mbangina nda nima nda ana ndi. Mbangina nda wuna nglambi silimbwigiyandi waa kita nyan yelavitndeyan wan ana glaatndi. Kavle vakna. Tamba wupma yelavitwun. Mangina nda kat yelavika nima njivwa tamba kwutiwun. Njivwa kwuka nat nimba kat tamba kwulakwun. ⁵ Mat nyan tiga wuna nandinya sila kuvuk tindi, wuna mbangi pitndi. Wuna nyaek nyime Isrel nimba mbik. Wuna yelang; Bensamin walinja yelang;. Judana angwa yelang;. Nat yelang; kat kwulaka tigandi.

Judana vak wuta kan vapmba mina yetiwun. Ferisi yetina vak vla yetiwun. ⁶ Judana vak nimamba kwutaa liwun. Kwutaa liga Kraistna mbaapma nimba kat siga viya liwun. Judana vak ana kai waa kalikwun. Nat nyan yetiwa vak vilaa wagedi. Ndi Pol Judana vak aywaa wuka yetiligandi waa wagedi. ⁷ Tamba yetuwa vak kat yelavikwun. Yetuwa vak apma vatna waa yelavikwun. Mbambala wupma ana yelavikowun. Kraistna mbaapma wuleilaa mandip vat yelavik vak yelavikowun. Tamba yetuwa vak kwo vatna waa yetiwun mbambala yelavikowun. ⁸ Yetuwa vak mina wupma ana yelavikowun. Kan kipmana ka kat aywaa kwo da waa yelavikowun. Nima nda kita ligandi. Wuna njambwi nyan Kraist Jisasna angwa vat vivak waligowun. Kan nima vatna. Nat nda kavle vak vla lindi, kai waga yaagili Kraistna angwa vak kat kwatigowun mbambala. ⁹ Ndinokwinana kitamba yetivat wawun. Judana vak wuka yetiga apma nyan wun waa ana waigowun. Apma nyanat tuwa vatna angwa kwutuwa njivwa ana ndi. Apma nyanat tuwa vatna angwa Kraist kat maawupmba yelavika kwutaa luwa vatna. ¹⁰ Kraistna angwa vat mina vivat yelavika tigowun. Kiyandi, God ndi kat kwondu kwindi, laatndi. Wungi kwondu klavat tigowun. Tak Kraist kat nima vat yilindi. Wuno wun kat nima vat yinjangat wowun. Wuno wun kat sinjeyan apma vatna. ¹¹ Wun kat sinjeyan kiyalaa liga laaiyowun waa yelavika ligowun.

GOD NDI KAT KWINDEYA NDA KLAVAT NDI

POL NĪMA NJĪVWA KWUTĪNDĪ

¹² Kraistnana angwa vat yigumba ana viga ligowun. Samat mina viga ligowun. Nima ana viga ligowun. Wungi vat vivat nima njivwa kwutigowun. Tak wun kat kwunapmak Jisas Kraist nima njivwa ndino kwutindi. ¹³ Kita mbaapma nimba mbambala ana yigumba viga ligowun. Samat samat viga ligowun Kraistna angwa vat. Kwutuwa njivwa wuno kingivat kwutigowun. Tamba yetuwa kavle vat kai waa kwagalalaa God wun kat kwindeya da klavat mbambala nima njivwa kwutigowun. ¹⁴ Wokwi kwulak vla tiga nyan vla kwutigowun. Wokwi kwulaka kwuka yiga kwulakweyan apma wenga klaigowun. God wun kat vilaa waigandi. Kraist Jisasna mbaapmamba liga apma vat tiga nyan min. Wunai liga kavat yaigamin waa waigandi wun kat. ¹⁵ God tiga maawupmba tiga nimba wunai kwuka njivwa vla yelavika kwutigandi. Ngwula kita nyan kwutuwa njivwa kat kai wandeyan God ndi kat mandip maawut kwindi, yelavikiyandi yigumba. ¹⁶ Godnanamba klana vat ana kwagala kiyani. Kwagala lapman yineyan apma vat yetigiyanin.

¹⁷ Kita mbaapma nimba kan wunai kwutiga njivwa vilaa ngwulo kwuka ay ngwula. Wuna kwupmba liga nimba kwuta njivwa vla ngwulo vilaa kwuka ay ngwula. ¹⁸ Tak ngwuk kat nima vak ngambuliwun. Mbambala ngwuk kat ak mbuka tigowun. Nat nima sakwat nimba ndi kat tiga diwai krosmba Kraist kiyanda kat tiga kai waa ligandi. Ndi kat miwa yiga yelavika nglaa tigowun. ¹⁹ Ndi kavle kava yilaa kavle yigiyandi.

Ndina ali mbangi kwunapma kat yelavika tigandi. God kat ana yelavika tigandi. Kan kipmana kavle nda kat mina yelavika tigandi. Kavle vat yiga linja vak kat ana wup yiga tigandi. ²⁰ Nin wupma ana liganin. Kan kipma nina ngepma ana ndi. nyinangwut nina ngepma wungian. Nin kat kwunakna nima nyan Jisas Kraist nyinangwupmba tiga ngega yandeyan njimbla kat kawika tiganin. ²¹ Ndi ngega yandi maa nina kavle mbangi kwagalalaa mandip mbangi klalaa ligiyandin. Ndina apma mbangi vla nina mbangi tigiyanidi. Ndi nima kwonduo tiga nyana. Nat nda aywaa ndina kwupmba tigiyanidi. Wan nda kat viga ligiyandi. Ndina nima kwondumba nin kat mandip mbangi kwigiyanidi.

4

KWUKA KALILINJA NJIVWA

¹ Wuna mbaapma nimba ngwuk kat nima vat yelavika tigowun. Ngwuk kat vivat yelavika ligbowun. Ngwuk kat yelavika solat siga tigowun. Ngwuk apma vat yetiga ngwuk. Wovuna. Njambwi nyana mbaapma wuleilaa apma vak yetignweya vak mbuka tigowun.

² Tak ngwula ngepmana taagwa vililikmba mbuka tigowun. Mbitna si Yuodias Sintiki. Walea limba vat kwagalalaa kitamba kanaguga yetimbila. Mbit taagwa kita mbaapmba nda mbit. Mbila njambwi nyan kita nyana. ³ Tak wunagwinala njivwa kwutqa nyan min. Min mbik kat awamba min. Mbik walea limba vak kat min mbik kat kwunapmila. Tak wunogwinana yiga wan apma nyaangit yiga mbutimbik. Nat

nyan Klemino nat nimbo yiga wunogwinana ndino yiga mbutndi. God ndina si lavu nyigamba tamba piliwutndi. Njimbla njimbla apma vat tigiyaay nimba aywaa ndino ndi kat piliwutndi.

⁴ Njambwi nyana mbaapmamba wuleilaa tingwa vak kat solat asi ngwula. Ngwuk kat nat njambi wowun. Solat asi ngwula.

⁵ Yigumba yeti ngwula. Nat nimba kat ke njika waga yetingwa. Nyinangwupmamba tiga nima nyan tamba ngega ya mina tigandi. ⁶ Nima vat ke yelavikngwa. God kat mina wagala ngwula. Nin kat apma vat yiligamin waa wagala ngwula. ⁷ Wupma wagalangweyan nima maawut yelavika yetingwa vak ngiligiyandi. Ngilindi, apma maawut yelavika nin Kraist Jisasna nimba nin waa yelavikiyangwuk. Ngini apma maawut yelavikngweya vat ana ngiligiyandi.

⁸ Kwukngweya vatna nginina nyaangit kingiyan ndi. Apma vat, savaguwanda vat, woseka walapman yinda vat, tagulo maawutno liga vat, nat apma vat aywaa, kan vak kat mina maawupmamba yelavika yetingwula. ⁹ Wunamba wukngwa nyaangit kingi nyaangit mina yelavika yeti ngwula. kwutuwun, vingwa vak wungi vak mina yelavika yeti ngwula. Wupma yelavika yetingweyan God ngwuk kat apma maawut kwilaa ngwulogwinana tigiyan.

POL NDI KAT SIVU KINDI

¹⁰ Wun kat kwingwa wenga tamba klawun. Klalaa yelavikowun. Ndi wun kat nima maawut yelavika tigandi waa yelavikowun. Njambwi nyan wun kat kwunatndi waa yelavika solat

siga tigowun. Tak wun kat njambi njambi ana kwilingwuk. Ava yambi kai. Njambi njambi wun kat nima maawut yelavika tingwa vak viga tigowun. ¹¹ Ngwutnamba wenga klavak wagalavak kat kai wowun. Wenga vak kat ana nimamba yelavika ligowun. Kwuta luwa nda ngiyambak kwutaa luwa. Nat nda klavat kat kai wowun. ¹² Wenga nda lapman tiweyan ana yelavitiigowun. Ndina mala. Wenga nda nima sakwat tiweyanana yelavitiigowun. Ndina mala. Wuna maawat kupma ligandi. Ngepma ngepmamba tiweyan kava kavamba liweyan ana yelavikowun. Wundi kat tiweyan wun yaak kiliwun mala tatndeyan ndina mala. Kwanda kwanda lapman kwanda kwanda nima sakwat tindeyan ndina mala. ¹³ Kraist wun kat kwondu kwindi maa kan kipmana vak kat ana niman yelavika ligowun. Ndina mala.

¹⁴ Mbambala kwo liwun mala wun kat wenga kwingwan apma vatna. ¹⁵ Tak wan apma nyaangit ngambuvak laakwa nandinya Masedonia kwagalalaa nyaangit mbupmat yiwun. Yiwun maa Godna mbaapmamba la nat nimba wun kat wenga ana kwilindi. Filipaimba liga nimba ngwula kapma apma wenga wun kat kwilingwuk. Nima sakwat njambi wun kat kwilingwuk, klawun. ¹⁶ Tesalonaikamba kwo liwun, nima sakwat njambi wenga kwilingwuk, klawun. ¹⁷ Wenga nda klavak kat kiyaandi waa ana wowun ngwuk kat. Wun kat kwingwuk maa God ngwuk kat apma wenga kwigiyandi waa yelavikowun. ¹⁸ Mbambala tamba klawun waa lavu nyingamba piliwutaa kwigowun ngwuk

kat. Nima sakwatna kwingwa. Kwingwuk maa klalaa kwo luwa vak kat tamba ngilindi. Ngilindi maa nat samat wenga kwo ligandi. Kwingwa wenga Epafrodaitas klalaa wunkat yaa kwindi. God kat kwunapmak kwinja apma njangu veiliga yagimbi vla tigandi wun kat kwingwa wenga. Wun kat kwingwa vak kat vilaa God ngwukkat woviyaguga ligandi. ¹⁹ Kwingwuk mala kwo luwa vat tamba ngilindi. Wuna njambwi nyan God ndino ngwuk kat kwindi maa kwo lingwa vak ngiligiyandi. Kraist Jisasna mbaapmamba tingwan ngwulo ngwuk kat kwigiyanidi. ²⁰ Nina nyaek God ndi apma nyana. Njimbla njimbla ndina si kwutaa katsoga tigiyanin.

NGINI LA LIGA NYAANGIT

²¹ Godna nimba Kraist Jisasna nimba ngwuk kat apma nandinya waa wowun. Wunogwinana liga kita mbaapma nimba ndino ngwuk kat apma nandinya waa waligandi. ²² Wunowinana liga Godna mbaapma nimba ngwuk kat apma nandinya waa waligandi. Njambwi nyan Sisana ngayamba liga Godna mbaapma nimba ndino apma nandinya waa waligandi.

²³ Nin njambwi nyan Jisas Kraist awagapma kwilinda apma vak klambangwuk walaa wawun.

GOD WAA NYAAGIT
The New Testament in the Iatmul Language of Papua
New Guinea
Nupela Testamen long tokples Iatmul long Niugini

Copyright © 1975 Bible Society of Papua New Guinea

Language: Ngepma Kwundi (Iatmul)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-12-13

PDF generated using Haiola and XeLaTeX on 11 Nov 2022 from source files dated 9 Oct 2020

b9b92e46-2e7b-584e-a145-60c7cfcc1e68